

Caput I.

DE NOVITIIS IN INSTITUTIS VOTORUM SIMPLICIUM.

§ 1.

De Domo Novitiatus.

Ubi Novitii habentur, ibi et Domus in qua commorentur haberi debet: ea instituenda ad formam juris, relatione habita ad Constitutiones cujuscumque Instituti; et ab auctoritate competenti comprobanda. — *De jure practico Regularium* — 1. 1., p. 69 et seqq.

Hinc *in Institutis Dioecesanis* nulla *Domus* justo jure fundari potest nisi annuente probante Episcopo — *Bull. Conditae*, p. 1, n. 2 — et si Sodalitas ad Dioeceses alias propagari accidat, nihil fiat, nisi singulari Episcoporum dato consensu — *loc. cit.* p. 1, n. V.

In Pontificiis Institutis tamen nulli ad habitum et professionem admittantur Postulantes nisi in Conventibus per Sedem Apostolicam in qualibet Provincia deputandis. — *Clem. VIII, § 20, Decret. general. De Reform.*

Regularium — 25 Iulii 1599 — 20 Martii 1601
— 19 Martii 1603. Urb. VIII, 11 April. 1631
— et in his Episcopis tantum relinquatur facultas, quae a Concilio Tridentino Sess. XXV. De Regul. et Monial. eis est tributa.

Proindeque in *Dioecesanis Institutis* CLAUSURAE moderatio ad Antistites attinet; in *Pontificiis* ad Sedem Apostolicam omnimode pertinet; Episcopis solum permittitur, quod leges Apostolicae istis concedunt.

Idem dicendum de *Privilegiis et Exemptionibus*, unicuique Ordini, Congregationi, aut Instituto a Summis Pontificibus quomodocumque donatis.

§ 2.

De Receptione Postulantium ad habitandum.

Constituta Domo, uti innuimus, Superiores adreceptionem Postulantium devenire poterint, praevio examine idoneitatis juxta normam Decreti S. Congr. super Statu Regularium. — *Romani Pontifices*, 25 Iulii 1848. Nempe: 1. si Postulantes sint legitimi; 2. qui vota perpetua in alio Instituto non emiserint; 3. non sint aere alieno gravati; 4. saecularibus negotiis

non sint implicati; 5. non sint minores aetate a jure requisita.

Sed heic plerumque oritur disputatio — utrum dispositiones *Clem. X in Decret. Etsi 16 Maji 1675*, — *De recipiendis Postulantibus*, sint applicandae Institutis votorum simplicium? et aliqui Canonistae, de more, *negant*; dum ceteri merito *affirmant*.

Namque Summus Pontifex « in virtute sanctae obedientiae praecepit omnibus et singulis *Superioribus, Provincialibus et localibus*, « quocumque nomine ac titulo appellatis, *quorumcumque Ordinum, ac CONGREGATIONUM*, ut « de cetero neminem pro Tertiariis, vel *Oblatis*, « seu *donatis* aut *Commissis*, aut *Servientibus*, « nec pro *Hospitibus*, seu *Postulantibus*, vel « *Cantoribus*, aut alio quocumque nomine nuncupatis, aut quovis habitu indutis, vel induendis, sub quovis praetextu, vel causa, « aut quaesito colore recipiant, seu admittant « ad habitandum intra *Claustra* — nisi *vigesimum aetatis suae annum* expleverint, omnesque sic receptos seu admissos — iis tantum « exceptis — qui completa aetate annorum *quindecim* pro Clericis, seu *Choristis*, in habitu « Novitiorum annum probationis agant — a monasteriis seu *Domibus Regularibus* omnino

« amoveant et ejiciant sub poenis, etc. » — *De jure practico Regul. 1, 2, 4, p. 91, et seqq.*

Atqui dictus Pontifex non distinguit: Ergo eius dispositiones quoque *Institutis votorum simplicium* sunt applicandae. Ipsi enim etiam sub regula vivunt; eadem est ratio legis; et cautela sunt necessariae ne scandala oriantur. Excepta tamen illa Instituta, quorum finis praecipuus est educatio adolescentium, et in approbandis Constitutionibus a S. Sede de hoc privilegio donantur.

§ 3.

De admissione Postulantium ad habitum.

His examinatis, ut Postulantes admittantur ad habitum, requiritur et sufficit Superioris licentia. *Bulla CONDITAE, p. 11, 1.*

Induto habitu *Instituti*, postulantes admittuntur ad formalem probationem; quae protrahitur ad annum vel *biennium*, quin a Superioribus tempus imminui possit; in Domo Novitiatus a S. Congregatione constituta: neque sine eius auctoritate immutanda; non aliter erigenda; neque Domus alibi transferenda: ita ut — elapso tempore probationis,

Novitius, si dignus sit, professionem illico EMITTAT: secus extra EJICIATUR. *Conc. Trid. Sess. XXV De Regularibus.*

Exurgit tamen hic illa celebris quaestio — quid si Novitius vocationem *nondum* fuerit expertus, cui data est facultas tempus *prorogandi*?

Canonistae plures et plures Doctores, *Superioribus esse licitum*, respondere non dubitant.

Nihilominus contrarium est verum. Siquidem Concilium Tridentinum, neminem praeterit, constituisse legem universalem; et lex universalis derogari non potest a quovis Superiore particulari Ordinis, vel Instituti: et hoc planum est.

Ideo Summus Pontifex *Benedictus XIV.* « audita relatione Praesulis *De Simoni* a Secretis S. Congregationis super Disciplina Regulari », hanc regulam praescipsit: ita ut *uni S. Sedi* data esset *illius prorogationis* potestas, et non aliis. Et *Gregorius XVI*, non modo decisionem sui praedecessoris laudavit et approbavit, sed etiam *Congregationi Regularis disciplinae* UNICE hanc dandi prorogationem reservavit: tractu temporis tamen Sedes Apostolica — praevia justa causa — dictam prorogationem ad *tres Menses* tantum Superioribus

Institutorum concessit. *Uti videre est in Normis approbandi nova Instituta Votorum simplicium Cap. VI Num. 75.*

Heic tamen serio hortamur Superiores sive Ordinum, sive Institutorum, ut in admittendis in Clastra Postulantibus, nedum *animi agant levitate* sed potius *sapienti prudentia*, se gerere debeant: namque, diuturna experientia edocti, nobis datum est, absque ulla asserere haesitatione — ex hoc capite praesertim *dispensationum, dimissionum, saecularizationum* oriri continuo necessitatem.

§ 4.

De sanatione interrupti Novitiatus.

Unicuique notum est, ut Novitiatus *cursus* intelligi debeat *de die in diem, de hora in horam.*

Hinc agitur inter Doctores alia quaestio — *a quonam sit sanandus Novitiatus si aliqua ex causa fuerit interruptus?* Superiores plurimi tenent « quod si *causa rationabilis* pro interruptione intervenerit, Superioribus ipsis (aiunt) et non aliis, tributam esse facultatem *sanandi interruptionem.*

Hoc autem non est veritati conforme: namque *Clem. VIII. in Decr. Generalibus de Reformat. jam citatis*, contrarium praecipit: docens — instante Procuratore *Sacram Congregationem* posse sanare cum conditione — *dummodo Orator in actu Professionis de praesenti indulto se uti velle declaret* — RELATIO HISTORICA *Antistitis De Simoni a Secretis S. C. super Disciplina Regulari, habita jussu Benedicti XIV — De jure practico Regular. 1. 3. 4. p. 106 — et seqq.*

Et praxis Sedis Apostolicae talis est; ita ut *Leo XIII* ad evitandam hujusmodi interruptionem — IN AUD. 4 SEPT. 1901 indulset — ut Novitii, vel Novitiae — *majori vi* — deserentes propriam Sedem, ratione longi itineris, vel causa aptandi novas domos, per breve tempus, possent commorari in precaria mansione; dummodo ad electum Monasterium a Superioribus vocati, *illico* pareant eorum mandatis.

Ex quibus facile deducitur — Sanationem ab interrupto Novitiatu etiam hodie Sedi Apostolicae dumtaxat esse reservatam.
